



UPA 2026/89-1

Aqqalu C. Jerimiassen

Atassut

04. juni 2026

Illorsuarmit nuutsitaasimanerinit pissutsit pillugit, najugaqartuusimasut pineqartut inatsisitigut isumannaatsumik pineqarsimanerisa qulakkeerneqarnissaa siunertaralugu, arlaannaanulluunniit attuumassuteqanngitsumik misissuisoqarnissaanut Naalakkersuisut peqquneqarnissaannik Inatsisartut aalajangiiffigisassaattut siunnersuut. Misissuitsineq 2027-mi upernaakkut tamanut ammasumik saqqummiunneqareersimassaaq.

(Inatsisartunut ilaasortaq Aki-Matilda Høegh-Dam, Naleraq)

17.juni 2017 pisoq isimma saani maanna pisutut eqqaamava. Ulloq tamatta arlaatigut uummatikkut sakkortoqisumik ikilerneqaatigisarput.

Ullormi taanna umiamakkumi qaqqat sisoerneranni tassaarsuaqarnera qanoq kinguneqarnersoq ilisimaarilluarparput.

Inuit inuunerinnik sisamanik akeqarpoq, eqqaaneqarneri ataqqinartuulik, Nuugaatsiarmit sisamat ajunaarput.

Nuugaatsiaq, Illorsuit Niaqornallu ulloq taanna inui aallarussorneqarput isumannaallisaanerup aqqani.

Nuugaatsiarmit paasiartumik imaaliinnaq uteqqissinnaanngitsut tassani paasivarput, illut aserortersimapput, nunaqarfik aseqqukuuvoq, illut amooqqarneqarput, angallatit aserorterput, qimmerpassuit toqorarput, piniarnermut atortut amooqqarneqarput inoqatittalu inuunerannik akeqarpoq.

Niaqornarmiut sivitsunngitsoq uteqqipput.

Illorsuarmit qularinngilara tassani piffissami Niaqornarmiut angerlartinneqarmata naatsorsuutigisimagaluaaraattaaq namminnertaaq angerlalerlutik. Taamaattoqanngilarli.....

Ullut 13-ip qaangiuppata ukiut qulaalut qaangiutissapput ulloq alianaqisoq pimmat.

Pisoq alianarnerpaaq aalajagiiffigeqataaffigaara kommunalbestyrelsimi ulloq 22. juni 2017, nunaqarfiit matungallarneqarnerat pisortatigoortumik Avannaata kommuniani kommunalbestyrelsimi aaliangiunneqarput, pisoq artornaqaaq taamani, taamanikkummi Nuugaatsiarmiumik illuatungeqarpunga.



Ullorpassuit nanertisimanermik malitseqarpoq takorloorsimangilluinnangaq aaliangerneq akisussaaqataaffigalugu.

Taamaattussaasimappulli pissutsit. Illorsuarmiut angerlarusunnerata takussaajuarnera tusarsaajuarneralu tamatta siutitsinni ittuttuartutut ippoq taamanerniilli, PAASINARTUMIK!

Ilumoorporli sumiluunniit nunatsinni najungaqarsinnaatitaaneq pisinnaatitaaffiuvoq, taannali sunik malitseqarpa?

Illorsuarni 2017-imili atassuteqaatit tamarmik qaminneqarput, innaallagiq qaminneqarpoq, sanaartugaangaluit tukiinnarneqarput allarpassuillu taaneqarsinnaasut uninngatiinnarneqalerput.

Illorsuit saava tassaavoq piniagassat aalisakkallu taassaangiusartut najungaata, nammineq isigalugu takugaanni uppersineqarsinnaavoq, anguniassagaanni qiviarfiit tamarmik puisinik arlariinnik takusassa qarfiusarmata.

Atassummi illorsuarmiortaqaarpugut, taassumallu oqariartuutai Illorsuit pillugit tusarnaartaqaarput.

Taassumalli oqaatsit anninnikuusaataaq ilanngukkusunnarput maanna taassallugit. Illorsuarmiut nuutsitaasimanertik pillugu nallinnartunngorsarneqassanngillat, oqaaserlu inuersuaaneq tulluannngilluinnartutut nalilerlugu oqaatigerusulluttaaq, misissuisoqarnissaanullu isummamut isumaqataanneqisoq ilisimaaraarput.

Uagut aajuna Atassummiit oqaaseq toqqaannaq taarusunnerusarput; Illorsuit ammaqittariaqarpoq!

Uagut Atassummi misissuititsinissamiit Illorsuarmiut najukkaminnut angerlarsinnaanissaata qanillisarnissaanut nukigut atorusunneruagut, uagut Atassummiit suliniupput tamaarsuullugu aallukkusunneruarput kiap qanoq suullu qanoq ajortiginerisa nassuiarniarsarinissaanniit.

Uagut Atassummiit naalakkersuisugut kaamisaaarusunneruagut suliaq maanna aallartittariaqaraat Illorsuit ammariartuaarnissaanut suliamik ingerlataqarnissaanik.

Illorsuit ammariartuaarnissaannut aallartissutissat tassaalluarsinnaapput, innaallagissiorfiata suli nutarpaseqisup ikeqqinneqarneratigut, Tusass suliakkerneratigut atassuteqaatit atortorissaarutaasa nutarternissaannut, pisiniarfeqaleqqissinnaanissaata aaqqiiffigineratigut, nakorsiartarfissap naammasseqqinnaalersup iserlugu suli nutaarsunnittup inaarsarneqarnissaa, aalisakkerivissatut suliarineqartup aallartisaqqissinnaanissaa piginnittuusut pisinnaappata, imertartarfiit atorsinnaalerseqqinnerisigut, orsussaasiviit immeqqinnerisigut, kommunip innuttaasunut sullissiviata qarasaasiaasa nutarternisigut, atuarfiup ammaqjissinnaalernissaatigut.



Sooq taakku tamaasa taavagut? Tassami nunaqarfik aallarteqqissappat tassa taakuummata uummataasutut pingaarnertut inissittussaasut, misissuiniarsarinissamiit atorusunnerugaakkagut uagut Atassummi, Illorsuarmiummi angerlanissaat salliutikkatsigu.

Atuarfik igalaajarnikuuvoq, ukiullu amerliartuinnartillugit aserfallakkaluttuinnartillugu kinguarsaannarutta aallaqqaataaniit suna tamaat sanaartoqqaartariaqalertussaasariaqassuarput.

Taanna pissangippat sulinermut pimoorussinerulaartariaqarpugut pisussanut utaqqiinnarluta tikkugaannarata!

Misissuisoqarnissaanut aningaasat immikkoortikkusunneqartut uagut Atassummiit Illorsuarni tusassip atassuteqaataasa ikeqqinnissaanut atorussinnaaneruagut, taassumap alloriaat siulleq nuisittussaassammagu, taamaalilluni aamma illorsuarmiunut neriut siulleq ikissooq, uummat ikilingaanikooqisoq mamisarluni aallarteqqissinnaalissaaq.

Taamaammat aamma ullumikkut eqqartungassatut inissimasuusooq imm.123 Atassummiit siunnersuutigisarput partiinit pimoorullugu tiguneqassasoq, naak siunnersuuteqartup partiiarit ilaasortat ilaannit nikaginnippalaarluni siunnersuutaannginnerarlugu oqallisissaannaanerarlugu oqartoqarnikuugaluaq, uagut suli Atassummi sulinerput pimoorupparput, paaserusoqaarpullu taamaammat oqallisissiakkoorlugu, ilumut ammarneqaqqinnissaanut Illorsuit inatsisartuni partiit qanoq suleriaqqikkusunnersut, imaluunniit tusarneraarutaannaanersut.

Taamaattumik Atassummiit una siunnersuut tunngaviatigut paasisinnagaluarlugu ilalinngilarput, uagut Atassummi Illorsuit ammarneqarnissaannut sulineq pimoorunnerorusukkatsigu, amerlanerussuteqartulli inatsisinut ataatsimiitsitaliamut ingerlatissappassuk ataqqinnissalluta.